

瀛涯勝覽集
星槎勝覽



2121

/

232/5

瀛

涯

勝

覽

集

張
昇
撰

00826

中
華
書
局

叢書集成初編

瀛涯勝覽集（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之二

統一書號：ISBN7-101-00894-1/K·367

瀛涯勝覽集

張昇

永樂中有人隨從太監鄭和出使西洋。遍歷諸國。隨所至。輒記其鄉土風俗冠服物產。日久成卷。題曰瀛涯勝覽。余得之。繙閱數過。喜其詳贍。足以廣異聞。第其詞鄙朴不文。亦牽強難辨。讀之數葉。覺厭而思睡。暇日乃爲易之。詞亦膚淺。貴易曉也。

占城

國于大海南。南距真臘。西距交趾。東北際海。自閩之長樂縣五虎門發舟西南行。順風約十日可抵其國。國東北百里許。有海口曰新洲港者。港岸立石塔爲標。舶至是繫焉。有寨曰沒比索。王以二酋領卒五六千輩專戍守焉。西南百里至王城。曰占城名也。城方有四門。門有守者。王乃鎖里人也。尚釋教。頂三山金花玲瓏冠。上衣花番布。若棉紬狀。下紫綵絲帨巾數匝。跣足。跨象。或乘小車。駕以二黃犢。其臣頂菱葦葉冠。亦類王冠。飾以金綵。其冠有品秩。上衣不過膝。下亦紫綵帨。王宮宏壯。墉壁整潔。門堅雕木。獸以爲威儀。民居茅茨。高不踰三尺。曲身出入。遮制者有法。許服紫。唯王白服。禁服玄黃。違者死。男蓬頭。女椎結于後。肌膚俱黑。上禿袖短衫。下亦紫綵布。皆女裝也。男女俱跣行。四時溫熱。並無霜雪。草木恒青。啖檳榔不絕口。如閩越俗。議婚。男先詣女成偶。或旬日。或旬有五日。然後父母親黨導以鼓樂迎歸。設酒筵。酒則釀

饔飯待熟。用筒啞之。賓主繞甕以次而啞。啞必注水。至味盡乃止。文字無紙。以椎羊皮及黑木皮書之。刑輕則繫以藤。重則劓之。盜必斷其肱。姦不問男女。俱燎其頰。極刑則銳木于舟。坐以罪人。順流而下。至木貫出口而斃。嚴示衆也。年無閏月。晝夜各分五十刻。以鼓記之。王當賀日。以人膽汁沐浴。將領獻人膽爲禮。王卽位三十年則入山。茹素受戒。命子姪攝國。居一載。則籲天自矢曰。我不道。當充虎狼食。否則病死。替年無恙則復辟。於是國人呼爲芳嚙馬哈刺札。極其尊稱也。有號屍致魚者。乃婦人也。其目無瞳。夜寢則頭飛入人家。食小兒穢氣。侵兒腹必死。頭返合體如故。移其體則不合而死矣。其夫匿不以聞者。罪及家屬。境有鰐魚潭。訟難明者。遣詣潭。直者雖往返十數而不遭害。傍海山野牛甚狠。逢青衣人輒觸之至死。蓋亦耕牛奔入山。積久而成羣然也。人則重其首。犯之不殺不已。市交易以金。間亦用銀。極寶愛中國青磁器。暨段疋綾絹。見則以金易之。厥產伽南香。觀音竹。降真香。烏木。尤勝他國。伽南香唯此地有之。價亦高。觀音竹如藤。長丈八尺許。色如黑鐵。每寸約二三節。犀角象牙甚多。犀如水牛。大者八百斤。體無毛。黑色鱗甲皮厚。蹄有三趾。獨角在鼻端。長者可尺五寸。唯啖刺樹葉條乾木。馬小於驢。水牛黃牛猪羊亦產。鵝鴨則罕。雞大者不踰二斤。果有梅橘西瓜蔗椰子蕉子。其波羅密形如東瓜。荔枝大如雞子。膚黃味勝蜜。核亦可炒食之。蔬有東瓜黃瓜胡蘆芥蔥薑。民務漁。不務耕種。米粒細顆長而雜紅。厥貢犀角象牙伽南香。

爪哇

古者閭婆其國有四皆無城郭初入杜板次入厓村次入蘇魯馬益次入滿者伯夷王都也王宮四面磚墉墉高餘三丈方三百餘里門館深嚴屋高四丈覆地以板蒙以藤花蓆踟蹰而坐瓦以堅木民居茅茨類皆磚庫坐卧于內王蓬頭頂金葉冠胸紫嵌絲悅腰束錦綺曰壓腰腰佩短刃曰不刺頭跣行或跨象或乘牛民間男蓬頭女椎結上衣下悅男必腰刀無老弱貴賤貧富皆然刀必雪花色鑲鐵鑄之柄飾以金或犀象飾往往蒙鬼面備極精巧會聚間有犯其首及爭鬪必以佩刃刃之傷死則遁踰三日則免罪當卽捕獲則仍受刃官無鞭朴罪不問重輕以藤繫之必刃以死殺戮爲常不足怪也市易用中國銅錢杜板者曰厓斑地名也約以千餘家主以二酋間有流寓多廣東人也漳州人也海渚小池水甘冽可飲號聖水傳云元將史弼高興征閩婆經月不克登岸三軍乏水渴甚二將默禱卓槍于渚泉遂湧出軍賴以濟又東行半日至厓村曰革兒昔者故沽灘地中國人客此而成聚落遂名新村約千餘家村主廣東人也渚番舶至此互市金寶番玲充溢居人多富又南水行可半日至蘇魯馬益港口淡水淺澁僅通小艇二十餘里始至蘇魯馬益曰蘇兒把牙約十餘家亦有首領間有中國人港口大洲林木蔚茂長尾獐萬數聚于中一里獐俗云胡孫也老獐爲主曾掠老番婦與俱國人求嗣者必具酒殺祈于老獐獐食之餘縱羣競食食盡少選獐雌雄交以此爲徵求嗣人回卽有妊不然無應也又水行八十里至埠頭曰漳沽登岸西南陸行半日至滿者伯夷乃王都也無虛二三百家總領七八人皆王佐也氣候常熱如夏稻歲兩熟坐卧無榻椅飲食無匙匕啖檳榔不離口寘飯于盤酢澆之餐則嗽去椰屑向盤掬而食食既水

飲待賓以檳榔。人有三等。西番賈胡流落而居久者。服食皆雅潔。一等也。唐人如廣東漳泉人流寓者。食用鮮華。率尚回教。持齋受戒。一等也。顏色黝黑。獠頭赤脚。崇信鬼道。釋云鬼國。卽此土人也。飲食粗惡。啖蛇蟻蟲蚓。稍燎以火而已。與犬同寢食。不以爲穢也。傳云。昔有鬼子魔王。青頰紅膚。赤鬚髮。與罔象交而生子百餘。以人爲糧。忽雷震石裂。乃出一人。衆異之。推爲主。遂領兵驅罔象鬼子而去。由是人得安焉。俗尚武勇。歲設竹槍會。始于冬十月。王偕妻出觀。夫妻各坐一塔車。妻前夫後。車高丈餘。四疏軒窗。駕馬以行。至會開場。列陣相向。各操竹槍。勁實若鐵。登場者亦攜妻至。妻亦操三尺棒。相格曰那刺。格已被傷斃者。王遣勝者出金鈔一箇。償之以孀婦。勝者卽已。凡婚姻。男造女家。合卺後。五日迎婦歸。鳴金鼓。吹榔筒。擁以刀盾。前後甚都。婦則裸而被髮。跣足。紫嵌絲帨。戴被金珠。綵飾寶粧。無不周備。姻隣亦以檳榔花草實綵舟助之。燕樂數日始散。喪事於病革。子弟請遺命。或水火葬。或犬腹葬。昇屍至海濱。縱犬殮之。盡不盡拾其遺。投水而後已。尤慘於水火也。有寵妾者。誓與主同往。盛粧悲號。俟焚骸火燬。亦投火死之。民間殷富。貿易用中國古錢。字書無紙。刻于茭葉。葉類鎖印字。以二十兩爲斤。十六錢爲兩。四姑邦爲錢。每邦二分。一厘八毫七絲五忽。截竹爲升。升爲一姑刺。蓋中國一升八合也。升爲棕黎。蓋八升。中國一斗四升四合也。月望。番嬪或二十餘。或三十餘。爲輩成隊。月下縛臂聯行。俚歌唱和。遍歷宦戚豪門。必投賞以錢。又有展畫指畫以諭衆聽。環之坐者。有笑有哭。殊能動人。最重中國花磁。暨麝花絹綺羅。厥產白芝蔴。葉豆蘇木。金剛子。白檀肉。荳蔻。龜筒。玳瑁。鸚鵡。有綠紅五綵者。鵝哥皆能言。又有珍珠雞。倒掛鳥。綵鳩。孔。

雀珍珠雀綠鳩之類。白鹿白猿猴羊猪牛馬雞鴨亦有之。果有芭蕉椰子。甘蔗粗大。長可二三丈。石榴蓮房蜜柿。郎拔若枇杷。稍尖。中有白肉。

舊港國

古號三佛齊。曰淳淋邦。隸爪哇。東距爪哇。西距滿刺加。南距大山。卜西北濱海。舶入淡港。入彭家裏。舍易小舟入港達其國。國人多廣東漳泉人。流寓此境。土沃人稠。地宜稼穡。諺云。一季種田。三季收稻。言收穫廣也。水多地少。人習水戰。將領之家。始得岸居。民卒往往筏居。繫于桮棧。港通潮汐。風俗語言一如爪哇。洪武間有陳祖義者。廣東人也。挈家遁避于此。爲將。橫甚。標掠過客。永樂間。朝命太監鄭和統海舶至。有施進者亦廣人也。具訴祖義于和。和領卒擒之。祖義伏誅。乃官進。仍回舊港爲將。進沒其女代之。賞罰黜陟。皆從其俗。俗好賭博。如把龜奕棋鬪雞。皆索錢具也。市亦用中國銅錢布帛之類。厥產鶴頂黃連降真沉香黃蠟。金銀如鍍花銀器。黑色間有白色。成色高者白多黑少。低者黑多白少。燕之氣觸鼻莫禁。西番鎖里人重之。鶴頂鳥大於鴨。毛黑脰長。腦骨厚寸餘。內黃外紅。俱鮮麗可愛。火雞大於鶴。頸亦過長。軟紅冠。銳指。毛如青羊色。腳長黑色。爪甚利。解傷人腹致死。食炭。雖擊之不死。神鹿大如鉅猪。高可三尺。短毛猪喙蹄亦如之。三貍祇啖草木。不近腥物。牛羊猪犬雞鴨蔬果之類與爪哇同。

暹羅

地方千里。環國皆山。峭拔崎嶇。地下濕。土疎惡。罕宜耕種。氣候不常。或嵐或熱。自占城西南舟行七晝夜。

方至新門海口。入港方達其國。王居宮室壯麗。民樓居。其樓密聯檳榔片。藤繫之甚固。藉以藤蓆竹簟。寢處于中。王乃鎖里人也。白布纏首。無衣。腰束嵌絲帨。加以錦綺壓腰。跨象行。或肩輿。金柄傘蓋。莢葦葉扇之。尚釋教。國人皆然。僧尼甚多。其服類中國。有菴觀。持齋受戒。民俗婦人多智。夫聽於妻。妻與中國人私。寢食與同。恬不怪也。男白布纏首。衣長衣。婦如之。乃椎結。男年二十。陰必嵌珠玉。及富貴者範金盛珠。有聲焉美。否則貧賤人也。婚則僧羣迎婿至女家。僧取女紅貼于男額。曰利市。陋不可言。踰三日。僧暨親黨擁檳榔綵舟送歸。乃開筵作樂。喪禮富貴者則灌水銀而葬。民間則舁屍投海。洲有金色鳥數十。飛來食之。有遺棄諸海。曰鳥葬。已而用浮屠教齋事。言語與廣東同。俗澆浮。習水戰。常征伐隣邦。市用海貳。一如錢價。厥產紅馬肯的石。次於紅鴉忽。明瑩如石榴子。國西北二百餘里有市鎮曰上水。通南。居人無慮六百家。各種番貨俱有。黃連香羅褐連香降真沉水。亦有花黎木白荳蔻火風子血結藤結蘇木花錫象牙翠毛。蘇木賤如薪。色絕勝。獸有白象獅貓白鼠。蔬果如占城。有米酒椰子酒。皆燒酒也。厥貢蘇木降真香。

滿刺加

舊名五嶼。以海有此山也。東南距海。西北皆岸。岸連山。地瘠鹵。收獲殊寡。故未稱國。隸暹羅。歲輸金五千兩。否則被伐。永樂七年己丑。上命大監鄭和冊爲滿刺加國。賜其將領銀印冠服焉。王自是不役屬暹羅。王攜妻子赴京謝。願修職貢。上賜舶還。其境有大溪。貫王宮入海。跨溪橋之。構亭于上。約二十餘楹。交易者來集。俗尚回回教。持齋受戒。王以白纏首。青細花袍。躡皮履。乘轎。民間男帕首。女撮髻于後。其體微黑。

短衫束腰以帔。風俗淳朴。民舍如暹羅。聯榻跌坐。業漁。剡木爲舟。泛海而漁。婚喪類爪哇。旁海有龜龍。患其龍高四尺。四足。身皆鱗甲。露長牙。遇之則齧。山出黑虎。比常虎差小。毛有暗花。文虎有能變人形者。白晝入市。羣行。覺者禽殺之。古城屍頭蠻。中國船舶亦至。其地梓木爲柵。關四門鼓樓。夜巡以鈴。內設重棚。有倉庫可貯貨。五月中方發舶。厥產黃連。香鳥木打魔香。此香乃樹脂墮地成。遇火即然。國人以當燈。及塗舟。水不能入。明瑩者若金箔。曰損都盧。厥可作瑠珠。名水珀是已。花錫有場山。曰樹沙姑。其皮如葛。搗漚成粉。可作飯。渚生水草曰菱葦。長如刀狀。韌堅。其子類荔枝。大若雞子。以釀酒曰菱葦酒。亦醉人。葉可作簾席。果有甘蔗芭蕉。子波羅蜜。野荔枝之類。蔬有蔥薑蒜芥。東瓜西瓜之屬。牛羊雞鴨罕有。驢馬無。

啞魯國小國也

南連大山。北距海。西距蘇門答刺。自滿刺加水行四晝夜可至。有淡水港。東連曠野。地宜早稻。其粒小。民業耕漁。風俗淳朴。婚喪禮與爪哇滿刺相同。市易用小棉布。曰拷泥。米穀牛羊雞鴨甚豐。乳酪亦多。國皆回回人也。厥產飛虎。如貓犬長。毛灰色。肉翅如蝙蝠。飛亦不遠。有黃連香金銀香之類。

蘇門答刺 那孤兒小國 黎伐國亦小

蘇門答刺者。卽古須文達那國。南連大山。北距海。東亦連山。距阿魯國。西距海。山連二小國。那孤兒黎伐是已。西洋之要會也。自滿刺加西南行。順風五晝夜可至。先有村濱海。曰苔魯蠻。舍舟十里可至國。都無城郭。有大溪入海。朝夕潮汐。海口大濤。舶至此往往沒溺。舊爲那孤兒國。被花面王侵伐。乃出戰。敗績。中

矢而死。子弱不能復讐。其妻忿而揚言曰。能復此讐者。我則夫之。與共國事。有漁翁聞之。領兵敗花面王。殺之。國賴以安。王妻德之。於是改適漁翁。國政聽焉。永樂七年。王來貢。上嘉之。十年。遣使入其國。假子率部衆弑王。卽漁翁也。其子曰蘇幹利。領衆奔棚于峭山。時復侵之。欲復其讐。永樂十一年。太監鄭和擒之。送京伏法。舊王子感激。修貢。其地氣候朝熱如夏。暮涼如秋。瘴發于五六月間。風俗淳厚。言語和媚。婚喪服用與滿刺加國同。民居亦如之。番舶往來。貨亦充牣。市用金錫錢。金錢曰那底兒。重五分。交易多用錫。厥產硫黃。出巖穴。山則不生草木。土石焦黃。地隘宜稻。歲兩稔。無大小麥。依山則種椒。國蔓生。如中國甜菜狀。花黃子白。其實初青。老則紅。半老則采之。曝乾。每百斤直白金一兩。有芭蕉子。甘蔗。吉柿。波羅蜜。有臭葉。曰賭爾烏。如中國雞頭菱狀。長八九寸。有刺。熱則開瓣五六。臭如腐肉。酥白十五片。甚甘。有子可炒食。甘橘四時有。綠橘不酸。奈久不爛。酸子白。俺拔。如消梨稍長。香冽。去其皮可食。蔬有蔥蒜。薑芥。東瓜。西瓜。東瓜久留不敗。西瓜綠皮紅子。長二三尺。黃牛多有乳賂。羊皆黑色。雄雞大者七八斤。易煮。味美異常。蚕桑不省繅絲。但成綿。那孤王一名花面王。在蘇門答刺之西。國小。僅比大村。人皆勞面。故號花面。祇千餘家。田少稻稀。有猪羊雞鴨。服用風俗語言與蘇門答刺同。

黎伐

小國也。南連大山。北際海。西距南洋里國。東南連那孤兒國。居民有一二千家。乃推一人爲王。隸蘇門答刺國。操舍一聽之。言語服用與荅刺同。山產野犀甚多。

南泥里

國際海東距黎伐國西北距海南連大山山南際海僅千餘家皆回回人也風俗朴實王居類樓高四丈周圍板蔽亦嚴整幽潔下則無壁收放牛羊之類民居與荅刺同市用銅錢厥產牛羊雞鴨粟粒少蔬果豐魚蝦降真香甚妙真白蓮花亦有犀牛西北大海中有平頂巨山半日可至曰帽山海乃西洋也曰那沒黎船皆以此山爲指南山下淺水有樹乃珊瑚也大者高二三尺分枝婆娑可愛根可爲瑇瑁器皿依山有居人二三十家人各稱王有問其爲誰曰阿孤楂我蓋王號也問者輒以是對殊可駭笑隸淳里國自蘇門荅刺國舟行三晝夜可至

錫蘭 總形

大海中有翠藍山山有三四高大者曰梭篤蠻自帽山東南乘東北風三日方至人皆穴居不問男女俱裸若野獸然無衣而食芋芭蕉子波羅蜜之類或魚鰕生來卽裸布略蔽身必生爛瘡昔佛度海至此解衣而浴土人竊之佛呪而然蓋附會語也俗云赤卵塢此地是已又西海七八日見鶯哥斯山又三二日至佛堂山始爲錫蘭國泊舟曰副羅里濱海山麓磐石隱然足跡尚存長可二尺傳云佛足至此也其跡有泉不涸人蘸之拭面目曰佛清淨蓋民俗之謬也寺有卧佛榻沉香爲之飾以八寶華麗鮮侔佛牙舍利子俱存于寺所謂涅槃其地是已又西北陸行五十里始至王居王鎖里人也尚釋重象牛煨牛糞灰遍體塗之牛則飲其乳而不食其肉死瘞之有殺者死刑或贖以牛頭金王宮民居且必調牛糞塗地而

禮佛王都大山信雲石有巨跡深二尺長餘八尺傳云祖阿訥生人足跡卽盤古也地廣人稠亞於爪哇國富饒民上裸下襪加以壓腰鬚毫皆剃留髮首布纏之遭父喪則鬚毫不剃女椎髻于後下亦縈白布隱潛飲食不令人見也膳必酥乳檳榔不絕口死者火之而葬其骨厥產鴉忽有青紅黃三色青朱藍石昔刺泥窟沒藍石二種出于沙中山被水衝流下則有之海洲日映光浮乃蚌珠氣也爲池間二三年冥蚌子池有司守之珠可淘取有稻芝藤菰豆無麥多椰子果有芭蕉子波羅蜜甘蔗瓜蔬牛羊雞鴨亦有市用金錢重一分六厘重中國麝香綺縠綵綳青磁器銅錢樟腦厥貢珠寶石

小葛蘭

東連大山餘方皆瀕海王乃鎖里人也尚浮屠尊重象牛婚喪服用與錫蘭同自錫蘭國別那里西北海行六晝夜始至日浪多酥用以和飯市用金錢重二分境土乃小國也

柯枝

東連大山餘方皆濱海自葛蘭國海行船山西北一晝夜乃至其國王亦鎖里人首纏黃白布上無衣下縈絲帨加以綵段一疋繫之曰壓腰臣民服用稍與王同屋用椰木及葉緝綴當瓦如苫蓋然家造庫藏貨以避火盜人有五等南昆輩與王同類祝髮懸脰以線乃貴族一等也回回人二等富有財者曰哲地三等牙蘭曰革全四等也卑賤者曰木瓜五等也木瓜業漁樵習服荷禁不許服長衣濱海居居簷僅三尺違者罪之上衣不過膝途遇南昆哲地人卽伏地候過乃起王尚浮屠尊敬象牛建寺範金爲佛青石

結座環以溝水旁穿井每旦鳴鍾鼓汲泉灌佛頂數回已乃禮之有曰濁肌者蓋優婆夷之類亦娶妻自胎髮不剃不櫛以酥接辮或十縷或七八縷垂于後牛糞灰塗體不衣而藤束腰白緣四末持大螺常吹而行其妻祇以小布蔽羞隨夫歷人家覓錢粟氣候熱如夏無霜雪春雨卽葺舍儲具逮夏連雨市陌成河比屋不能出入至七月始霽八月望後始晴至冬猶然三月又雨諺云半年有雨半年晴者是已市用金銀錢金錢九成色曰法南計一分一厘銀錢僅如螺歷曰荅兒計四厘每十五當金錢之一婚喪各以類不等厥產胡椒往往種于圃四百斤直金錢百文銀直五兩珠以分論有米粟麻豆黍稷無麥有象馬牛羊犬貓雞無驢馬豎鵝

古俚

西洋大國也西瀕海南距柯枝國北距狼奴兒國海近山遠東七百里許距坎巴夷自柯枝海行可三日至距中國十萬餘里永樂五年上命太監鄭和等賜王以誥命陞賞其將領有差皆冠帶勒石美之王尚浮屠敬象牛人有五等一回回一南毘一哲地一革全一木瓜王南毘人不食牛肉將領回回人不食豬肉昔王與回回誓互相禁食銅範佛像曰納兒佛殿以銅瓦座傍穿井汲泉浴佛而禮之取牛糞調水塗地及壁臣民大家晨起亦用牛糞塗地煨牛糞灰甕于身每旦水調灰抹額及股謂敬佛也傳云昔有聖人曰某些行教化人人俱服從某些遠適遣弟曰撒沒黎主之弟乃縱誕鑄金犢以諭國人曰此乃聖主敬之有驗人罔不從命牛日糞金人獲其利遂信之不疑某些歸恚其弟誣惑遂毀牛弟恐於是跨象而

通國人猶望其還。故敬象牛者以此。國事皆決于二將領。乃回回人也。國人半崇回回教。禮拜寺有二三十餘。七日一禮。至日齋沐謝事。午時男女拜于寺。未刻乃散。始治他事。俗尚信義。中國舶貨至。皆二將領主之。遣賈僧議直。言定再不易。其算法祇憑手指屈伸。分毫不謬。市用六成金錢。曰吧南。重二分。文二面。小銀錢曰搭兒。重三厘。秤曰法刺。二十兩爲斤。當中國一斤九兩六錢。升曰党憂黎。當中國一升六合。樂則葫蘆爲樂器。紅銅絲爲絃。歌樂自和協。鏗鏘可聽。婚喪禮各以類。王老則不傳子而傳外甥。無姊妹子則傳弟。無弟則傳子。有德者。古今皆然。刑無鞭笞。輕則斷手足。重則割金誅戮。其則沒家夷族。有罪繫之。輒承服。不承服則寘其手指于沸油中。半餉。三日後驗之。爛者伏辜。全者免罪。免罪者將領導以鼓樂還家。親戚致賀飲酒。西洋布曰摺黎。出於隣邦。坎巴夷之屬。每疋濶四尺五寸。長二丈五尺。直金錢八文。有色絲間花。濶五尺。長一丈三二尺。直金錢百文。厥產胡椒。亦以圖種。十月熟。富家則多植椰子樹。千株至二三千者有之。嫩者有漿可釀酒。老者可作油糖或飯。殼可作杯。煨枝灰可廂金。枝幹可搆室。葉可蓋屋。蔬有薤芥蘿蔔胡荽蔥蒜葫蘆木瓜瓜。四時有小瓜如指。長一寸許。味美。果有芭蕉子波羅蜜。木鼈子樹高十餘丈。綠葉如柿。三四十有米無麥。有雞鴨無鵝。羊高如驢。灰色。水牛不大。黃牛則大有至三四百斤者。不食其肉而取其乳。酥不絕口。牛死則埋之。畜有孔雀烏雅鷹鷂鸞燕。無餘鳥。厥貢金絲寶帶。金絲如髮。結花綴八寶珍珠。

溜山

四面濱海，僅如洲渚。小國也。曰牒幹，無城郭，依山聚居。西距海，中有石門如城闕，有八大地，皆以溜名。亦通舟楫。餘小溜無慮三千數，所謂弱水三千者是已。人皆巢居穴處，不識菽粟，而啖魚鰕，無衣，祇以葉蔽前後陰。舟行遇風，一失入溜，則水弱而沒溺，故舟人謹防之。牒幹國皆回回，風俗淳厚，動遵教門，業漁，好種椰樹，男膚微黑，白纏首，下紫帨，婦人短衫，下亦紫帨，大帨蔽面目。婚喪禮遵教門行，氣候常熱如夏，土瘠，米少無麥，市用銀錢，厥產降真香，椰皮結繩，可貫板成舟，瀝青塗之，堅如鐵丁，龍涎香然之，香清，直與銀同。海貳采而鬻于暹羅，葛刺用與錢同，鮫魚齒之可鬻于隣國。曰溜魚，織絲帨甚精緻，又織金帨，男可紫首，牛羊雞鴨俱有。

祖法兒

國瀕海依山，東南皆海，西北重山，自古俚國西北海行十晝夜可至。無城郭，人皆崇回回教，體幹修碩，語言朴實。王纏首以白細布，衣青花細綵帨，或織金錦袍，穿靴躡履，乘輜跨馬，前後象駝馬隊成行，鼓吹簫築鎖棒，民間纏首，長衣靴履，當禮拜日罷市半日，長幼俱沐浴，盛服塗容體，或齋薇露，或沉水香薰衣及體，又以爐然沉檀香，然後行禮，禮既乃散，香滿街市，半餉乃已。婚喪遵回回教，氣候常如秋，無寒，市用金錢，重二錢，徑一寸五分，文以人形，銅錢重四分，厥產乳香，乃樹脂也，又有血結蘆薈，沒藥，安息香，蘇合油，木鱉子之類，以易中國紵絲磁器，其米麥、豆粟、黍稷、麻、穀、瓜、茄、牛羊馬騾、貓犬雞鴨俱有。山駝雞、匾頸雞，身如鶴，長三四尺，脚二指，毛如駝，行亦如駝，故喚駝雞。駝有單峰者，有雙峰者，人以騎坐，肉以市鬻，厥貢

乳香駝雞等物。

阿丹國

國瀕海，富饒，崇回教。阿刺壁言語，性情強梗悍戾，有勝兵七八千，馬步俱精，隣邦畏之。自古俚國舟西行可至，永樂九年詔中使賜命，其國王遠迓謹甚，卽諭其國人就互市。王頂金冠，衣黃袍，腰寶粧金帶，屬禮拜日則易白纏頭，以金錦爲頂衣，白袍乘車列象而行。將領等冠服有差，民間男則纏頭，衣撒哈刺錦繡紵絲細布等服，有靴鞋。婦人則長衣頂珠冠，綴絡耳金廂寶環，手金寶鐲，足指亦有環，絲帨金銀器皿絕勝。赤金錢曰哺嚕黎，重一錢，而有文。紅銅錢曰哺嚕斯，市易用之。氣候溫和，曆無閏，以月出定月之大小，夜見月，明日又爲一月也。有善推步者，定某日春則花木開榮，某日秋則花木彫落，日月交蝕，風雨潮汐，無不驗者。民居累石爲壁，上覆以磚或土，高至於四五者，市肆熟食及綺帛書籍俱如中國。粒食多用酥糖蜜製，味極精美。厥產有米麥麻豆蔬菜，果有萬年棗松子把擔乾葡萄核桃桃花紅石榴桃杏之類。獸有象駝牛羊雞鴨犬貓，無猪鷄，羊則無角，頰垂短毛，有紫檀薔薇露簷荷花白葡萄福鹿青花白駝雞，福鹿如驃，白首白眉，滿體細間道青花如畫，青花白駝雞如福鹿，麒麟前足高九尺餘，後足六尺餘，項長頭昂至一丈六尺，傍耳生二短肉角，牛尾鹿身，食粟豆餅餌，獅子形類虎，黃黑毛，鉅首濶口，尾稍黑，其長如纓，聲吼如雷，百獸見之皆伏。厥貢金廂寶帶珍珠八寶全冠鴉忽等各種寶石，地角金葉表文。

榜葛刺國